

# «Oz cultura da giuvenils – puschmaun ierta culturala

La segunda saira da dialog per la giuventetgna

MATIA DEMARMELS/FMR

■ **Co è la cultura da giuventetgna grischuna? Tge vul ella e tge dovra ella? – Talas dumondas èn vegnidas discutadas venderdi passà en in «dialog» digital. La quintessenza: La giuventetgna dad ozendi distingua ina gronda varietad.** «Jugendkulturen – (k)ein Teil der Bänder Kultur!?» – quai è stada la dumonda directiva discutada venderdi passà a chaschun da la segund'occorrenza da dialog 2020, organisada dals posts spezialisads per giuventetgna da la Baselia catolica e da la Baselia evangelica reformada dal Grischun ensemen cun «jugend.gr», la federaziun tetgala per promover uffants e giuvenils dal Grischun.

## Libertad e spazi

Il kick-off a l'occorrenza ha dà il rapper ed autur, *Andri Perl* en furma d'ina contribuziun litterara. Cun anecdotas or da sia giuventetgna a Cuir ha el formulà differentas tesas – per part provocativas – davart las premissas ch'i dovra per promover ina sauna cultura da giuvenils: Activitads d'uniuns possian gidar, quellas sajan però en in rom cler definì. «Per nus hai duvrà dretgas libertads e spazi – damai davent da trenaders e scolasts.» Il medem mument saja stà necessari che persunas sorprendian responsabladad ai-



Andri Perl durant sia contribuziun litterara.

FOTO SCREENSHOTS LIVESTREAM

fer ina community da giuvenils. Quai possa vegnir promovì dad instituziuns e geniturs – i saja d'encuraschar e betg da dubitar las ideas dals giuvenils, uschia Perl. «Savens datti insatge or da culturas da giuvenils. Tolerar e promover la giuventetgna n'è betg be in bel gest, mabain ina premissa per sviluppar la societad. Quai ch'è oz cultura da giuvenils è damun nossa identitad e puschmaun

noss'ierta culturala», ha constatà l'um da la gruppa da rap Breitbild.

Participà a la segunda part dal event – numnadamain la discussiun al podium – han quatter giuvnas e giuvens dal Grischun ch'èn activs en differentas culturas e scenas da giuvenils: *Jamira Estrada* (studenta e DJ), *Sara Schott*, independenta e trenadra da crossfit, *Andri Münger*, student da geologia ed activ en la riga blava

e *Fabian Florin*, artist da grafits ed engaschà en la prevenziun da drogas. Ensemen han els empruvà da definir e da declerar la giuventetgna grischuna.

## Discussiun armonica

Naturalmain hai dà differentas ideas e vistas pertutgant las tematicas discutadas. Quai ch'ha però dà en egl spertamain è ch'ìls protagonistes e las protagonistas han discutà en ina moda e maniera fitg respectusa. Mintgin ha pruvà da chapir ils arguments da l'auter e da responder a las dumondas fatgas dal moderatur *Claude Bachmann*, cun integrar las ideas da tschels. Ina cultura da discussiun fitg constructiva, prest armonica, ch'ins observa savens tar giuvenils d'ozendi.

Quai che para dad esser cler per tuttas e tuts quatter è ch'i na dat betg «ina» cultura da giuventetgna: «I dat tantas culturas da giuvenils, sco ch'i dat giuvenils», ha per exempel manegià Fabian Florin.

## Total digital

Causa da corona ha l'occorrenza gi lieu senza publicum. Interessadas ed interessads han persequità il event en furma digitala ed han gi la pussaivladad da far dumondas via SMS. Sin youtube è da chattar ina registraziun da l'entira occorrenza, sut il chavazzin «Dialogveranstaltung & Podiumsdiskussion: Jugendkulturen – (k)ein Teil der Bündner Kultur!?».